

2 John

Pipe arrpenhe John-elarle intelhe-ileke Ngkarte-kenhe areyeke

¹ Arrantherre ingkirrekele ayenge itelareme, tyerrtye areyele ayenge ileme alartetye apententye akngerre Jesus-kenhe areyeke, the pipe nhenhe-arle arrekatherre intelhe-ileme, Ngkarte-kenhe areye-arle tyatye yanhe ikwerele-arle aneme, Ngkartele-arle akngakeke Ikwerenhe areyenge anetyeke. The kwenhe akwetethe arratyte anthurrele arrenhantherrenhe ingkirreke arntarnte-arerle-aneme! Ayenge anyente-ante kwenye, kenhe tyerrtye yanhe areye ingkirreke-arlke, nhenge angkentye arratyte renhe itelarerrirreke-arle Jesus-elarle akaltyele-anthekeke, itne-arle kwenhe arrenhantherrenhe mwantyele arntarnte-arerlte-aneme. ² Alakenhe ikwerenge anteme, angkentye arratyte nhenge arratyte itelareke-arle, anwerne ikwere alknwirretyakenhe anetyenhe. Anwerne renhe akwete-ante arratyte itelarerlte-anemele.

³ Ngkartele-arle, Jesus Christ Alere Ngkarte-kenhele-arle, anwernenhe ingkirreke akwetethe mwantye-mwantye-ilerle-anerretyenhe, anwernenhe arntarnte-arerle-anerremele ratherre-arle anwerneke ahentye anthurre aneme. Anwerne kwenhe akwetethe nhenge utnenge atnerre atnyeneme, mwerre anerlte-anemele anwerne-arle kwenhe Angkentye arratyte ikwere-atherrenhe arratyte itelaremenge.

⁴ Atyewe Ngkarte-kenhe atyinhe areye, the aweke-arle akangkemele anemele arrantherre arrpenheme-arle

apetyemele atyenge ileke, arrantherre-arle Ngkarteke ar-
ratye anerlte-anemenge. Itne atyenge ileke arrantherre-
arle akwete mpwarerlte-aneme nhenge iwenhe-arle Re
anwerneke imerneke nthakenhe Re anwerne mpware-
tyeke ahentye-aneme.

⁵ Atyewe atyinhe areye, the kwenhe intelhe-ileme
arrenhantherrenhe irlpangkelhe-iletyeke iwenhe the
arrekatherre arrekwele ileke-arle. The arrekatherre
iletyeke ayeye rante-rante-akerte, Ngkartele-arle
anwerneke arrule anthurre ileke, anwerne arrekweleke-
amparre-arle ayeye Ikwerenhe arratyete itelarekenge.
Re anwerneke ileke akangkelhe-ilerretyeke arntarnte-
arerremele anetyeke. ⁶ Nthakenhe-arle anwerne
Ngkarteke arratyete-arratyete ahentye anetyenhe?
Ngkartele kwenhe ayeye areye anwernenhe antheke
arratyete apentetyeke. Anwerne Ngkarteke ahentye-
aneme, nhenge anwerne Renhe awemele arratyete
apentemele. Alakenhe-arteke arrantherre arrekwele-
ngentyete aweke-arle.

⁷ Nhenge urrtyalthe atningke alherlte-iweke-arle ty-
errtyete areyenge apmere arrpe-anenhenge. Itne Jesus-
akerte urrtyirremele ilerlte-apemele Rarle akwele tyer-
rtyete arratyete anetyakenhe, itne kwenhe angkeme Rarle
akwele tyerrtyete arratyete atnyenetyakenhe aneke. Itne
kwenhe angkeme Rarle akwele utnenge ware akwele
aneme. Urrtyalthe yanhe areyete tyerrtyete areye Jesus-
ngentyete artepe untyemelhe-ileme. ⁸ Itne-ketyete arel-
hewarreye. Itne apeke urrtyirremele ileme-ketyete nhenge
arrekatherre urrtyekele-iletyeke! Nhenge arrantherre
apeke tyerrtyete areye aweme nhenge urrtyirrentyete
angkerlengete itnenhe apentemele-arlike, kele arrantherre
apeke aparlpe-ileme-ketyete iwenhe-arle arrantherre ar-
terre mpwarerlte-aneke inetyeke. Arrantherre kwenhe

inetyakenhe anetyenhe nhenge iwenhe-arle Ngkartele arrenhantherrenhe alhileke-arle-iperrele.

⁹ Jesus Christ-ele anwernenhe Angkentye Mwerre akaltyele-antheke. Nhenge tyerrtye arrpenhele apeke nhenge akngarte-iwetyeke nhenge iwenhe-arle Jesus-ele anwernenhe akaltyele-antheke imerte Angkentye Mwerre renhe akurne-ilemele ayeye arrpenhe-werne-atheke akngarte-iwemele, kele Ngkartele tyerrtye yanhe ikwerenge apurte anetyakenhele anemere, arrangkwe. Kenhe nhenge tyerrtyele apeke akwetethe arratyete itelarerle-aneme Angkentye Mwerre renhe, kele Ngkartele-arlike Alere Ikwerenhe-arlike arratyete apurte aneme nhenge tyerrtye yanhe ikwerenge. ¹⁰ Tyerrtye arrpenhe apeke arrekatherre-werne apetyeme-ketye, re apeke arrenhantherrenhe ayeye arrpenhe Jesus-akerte akaltyele-antheme-ketye. Ayeye Jesus-elarle ilekenge arrpenhe anthurre ulkere. Nhenge tyerrtye alakenhe apeke apetyerlenghe, apmere arrekatherrenhe-werne akngetyetyale anaye. Renhe ikngwetyale anaye, renhe yernirtnaye. ¹¹ Ayenge kwenhe alakenhe angkeme, tyerrtye yanhe-arteke-arle urrtiyirrentye ilentye akngerre, itne Ngkartele warrke-irretyakenhele. Nhenge arrantherre apeke itnekele-arlenghe aneme, arrantherre itne-arteke-arle akurne anetyenhenge.

¹² Arne arrpenhe atningke kwenhe tharle arrekatherre ilyetyeke ahentye aneme, the itnenhe pipe-ke intelhe-ilyetyakenhe alakenhe nhenhe re-arteke. Ayenge kwenhe arrekatherre-werne apetyetyeke ahentye aneme, anwerne apurte anemele angkerretyenhenge. Yanhe ikwere-iperrele anteme, anwerne akangkemele anthurre anetyenhe.

¹³ Kenhe Jesus-kenhe arrpenhe areye, Ngkartele akngakeke areye-arle, itne arrekatherre tyatyete ikwerele-

2 John 13

4

2 John 13

arle itirrerlte-aneme.

Ye, kele yanhe ingkirreke ware.

Angkentye Mwerre
Portions of the Holy Bible in the Central and Eastern Arrente
language of Australia

copyright © 2002-2014 Wycliffe Bible Translators

Language: Eastern Arrente (Arrente, Eastern)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 12 Jun 2019 from source files dated 5 Mar 2019

26bd077a-984c-5596-a099-f37f2651f363